


Graziano Pesenti OCD, *San Siro Vescovo di Genova*, Editrice Velar, Gorle (BG) 2017, pagg. 48


Lidia Pistarino, *Santa Caterina Fieschi Adorno e i suoi Apostoli di Carità: Ettore Vernazza e la Venerabile Battista Vernazza*, Editrice Velar, Gorle (BG) 2017, pagg. 48

Questi doi libretti fan parte de 'na colann-a ch'a l'é za arivâ a ben 559 titoli, a "Colann-a bleu" *Messaggeri d'amore*: biografie de santi, beati, venerabili, sèrvi de Dio, fondatoî de ordini e congregaçioin religioze, testimònni de giusticia e de paxe. O numero de pagine o l'é o mæximo pe tutti, 48, che dêvan bastâ pe contane no solo a vitta ma tante atre notiçie ascì in sciò periodo stòrico, e reliquie e i pòsti dov'en veneræ, atre personalitæ ligæ a lô inte quarche mòddo, con tante fotografie a colori de quaddri, statoe, gexe, localitæ. Into catalogo gh'è anche San Zòrzo, o Paddre Santo, Antonio Maria Gianelli, Paola Frassinetti, Præ Orion, Tomaxo Reggio e atri.



Francesco Pittaluga, *Dinanzi...il mare*, Erga Edizioni, Genova 2017, pagg. 252

Console da Compagna, inzegnê arionaotico co-a pascion de nave e do mâ, figurante into Corteo Stòrico de Zena, atô dialetale, baistrochin, òua anche scritô, l'aotô de questi vinti raconti o n'â vosciuo mette a parte de tante esperiense da sò vitta mescciæ con cöse de fantaxia, lasciandone però co-a coîxitæ de savéi dove finisce l'invençion e comensa a realtæ. E stòie en tutte ambientæ in pòsti de mâ, sorviatutto îzoe: Stromboli, dov'o l'é stæto de caza, Lipari, Panarea, Capraia, Sardegna, ma anche a nostra Rivea de Levante e pòsti lontan comme l'Africa, l'India e o Giapon. Insomma, o ne fa ascì in pò leçion de giögrafia. Figue no ghe n'é, ma o l'é bravo a describe pòsti e gente comme se i vedèscimo!



Paolo Giardelli e Mauro Valerio Pastorino (a cura di), *Val Brevenna. Segni, memorie e identità nel corso della storia*, Erredi Grafiche Editoriali, Genova 2016, pagg. 416

Libbro fortemente vosciuo da 'n valigian, o Loenso Ban- chero, vegnuo in çitæ da picin co-i genitoî ma co-inta memòia i ricòrdi intatti di anni pasæ lasciù, a sentî parlâ i vegi. 'N òmaggio a 'na valadda in pò ascoza e beliscima, 'na speçe d'enciclopedia da val Brevenna, scritta da studiozi specialisti de varie matêie tratae: a conformaçion do teritòio, l'archiologia, a stòia da-i tempi de Romma a-a giornâ d'ancheu, e gexe e a religion, i mestê, l'economia, o mangiâ, e tradiçioin, l'instruçion, a salute, l'emigraçion, o spopolamento dòppo l'urtima goæra, a speransa e i segnali de 'na rinâscita. Bèlle e imagini, d'epoca e atoali, che ciù ancon che e paròlle toccan o cheu e invîtan a vixità e tante fraçioin che forman o comune ciamòu Valbrevenna.

